




EDGAR JOAQUIN VOS, WATTY E NÒ A BAI LAGA NOS E TA ASINA SERCA DI NOS CURAZON

Awe ta un di e dianan cu mas nos ta recorda Edgar Joaquin Vos q.e.p.d. pa nos Watty. Un dia cu nos ta recorde di trempa, efectuando su preparacionan pa e celebracion di e dia di cuerpo policial. Ki orguyoso e tabata sinti su mes.

Watty Vos a nace dia 16 di Augustus, 1937 aki na Aruba. Un di su caracteristica tabata su determinacion y su consistencia. Pa Watty un trabao bon haci ta loka ta engrandese bo dia. Un sonrisa riba un cara di un di nos grandinan ta loka tabata su empuhe pa e sigui cu su trabaonan. E tabata kier a defende tur esnan cu pa un motibo of otro no por logra di alcanza felicidad. Ta pa e mesun motibo aki despues di a alcanza su MULO-diploma y su diploma di adjunctcommies Watty a sigui su estudionan p'asina e por bira abogado. Na 1970 e la logra su gran anhelo di converti su mes den defensor di su pueblo y a inicia su carrera na oficina di abogado di Gonzales, Zielinsky y Gibbs.

"MI PUEBLO SU DESEO MESTER BIRA REALIDAD"

Watty tabata sinti cu su deseo pa trece un mihor bida pa su pueblo no por ser alcanza solamente den su practica sino e mester a bai mas leu, pesey na 1971 Watty a drenta e arena politico. E mesun aña el a keda eligi y a bira miembro di Parlamento di Aruba, cual funcion el a mantene te 1973.

Su deseo di mas grandi a keda realiza na december 1973, na unda e la keda nombra como Ministro di Husticia y alavez vice-Prome Ministro di Antiyas den Gabinete di Juancho

Everts, cu a l posicion el a mantene te 1975. Posicion

cu a dune e oportunidad di bringa un poco mas pa su hendenan, esnan desampara, esnan den problema.

Pa efectua e Status Aparte di Aruba Watty hunto cu su coleganan a keda nombra den un gobierno tranistorio como diputado pa Aruba. Despues di Aruba su Status Aparte na 1986, formando parti di AVP, Watty a keda nombra como Ministro di Husticia y Deporte, cual posicion el a mantene te cu februari 1989. Di februari 1989 te cu augustus 1994 Watty tabata miembro di Parlamento den oposicion y desde un di september, 1994 el a wordo apunta como Ministro di Husticia y Obranan Publico.

Mas ainda Watty tabata miembro di e comision di Reino, Comision di Antiyas y e delegacion Arubano na dos conferencia di mesa rondo, respectivamente, na 1981 y 1983. un comision cu tabata tin e tarea di formula e futuro di e status di Aruba den Reino Hulandes.

Na 1980 el a ricibi e condecoracion "Ridder in de Orde van de Nederlandse Leeuw" y na 1990 el a ricibi e condecoracion di "Comandeur in de Orde van Oranje Nassau."

BAAS DEN BO PROPIO CAS UN DI E METANAN DI WATTY

E balor humano di Watty especialmente riba e tereno di husticia por nota cerca tur esnan cu awe ta recorde. Ta cu su man duro pero cu curazon grandi cu e la trece un reorganizacion total den e cuerpo policial. Riba tereno internacional e la percura pa e organizacion di Caribbean Financial Action Task Force, sin lubida cu ta su



persona a traha riba fundacion di un scol pa polis aki na Aruba. Den e organizacion aki Watty a dedica hopi tempo na combatimento di criminalidad internacional, incluyendo, combatimento di narcotrafico y labamento di placa. Prome cu e la fayece el a ricibi e honor di mas halto cu un Arubiano por ricibi ora cu el a keda nombra como presidente di e organizacion aki. E prome Arubiano pa carga un responsabilidad internacional di asina peso.

Riba tereno local pa loka ta trata obranan publico Watty a traha duro pa logra e meta di haci posibel cu Aruba su hendenan por bira doño di nan propio cas, dor di construccion di mas cas na Aruba, como tambe otorgamento di tereno pa traha propio cas. Su idea briyante di ofrece e casnan di pueblo na e jiu-nan di Aruba na un sistema

di pago modera p'asina nan bira baas den nan propio cas ta algo cu ta biba latente den cada curazon, den cada hogar.

E CALIDAD DI BIDA MESTER TA IGUAL PA TUR HENDE

Ora cu papia di e trabaonan cu Watty a haci den su carera politico pa drecha e calidad di bida di e pueblo cu el a stima no por laga afor e trabaos grandi cu el a cuminsa riba e problematica di choller. Teniendo encuesta e problema cu a incia den e cayanan cu pe tabata su cayanan di wega, su cayanan di crecimiento, cu su mesun amigonan di hubentud, e no por a keda sin duna un man pa rescata esun cu no tabata por otro. Watty a drenta e casnan di choller riba invitacion di esnan cu tabata manda e grito den silencio pa un

man di ayudo. Ta dor di su esfuerzonan cu awe ta existi un centro di rehabilitacion na Seroe Colorado y Centro Dakota.

Prome cu e la fayece Watty cu ta un romantico di curazon a percura pa e mesun chollernan cu ningun hende no tabata kere cu por a rehabilita a yega na nan propio banda y tabata compana nan hasta ora tempo tabata duna den nan entraganan musical.

Prome cu e la bai laga nos Watty a percura pa e por a entrega su sabiduria na mas di un persona y a tuma bao di su brazanan Oslin Benny Sevinger, kende tabata e persona cu prome cu e la sosega e la pidi cu su wowonan y haciendo un sena cu su braza poniendo su man riba su frenta pa e carga e pueblo di Aruba pe y trata na pone e sentimiento, e dolor di su hendenan den su curazon y sigui cu su trabao. Na Aruba awe, den su pueblo, den e casnan, den su barrio no tin ni un persona cu no ta sinti su presencia, e toke di su voz profundo, su amor. Al fin al cabo, e no a bai laga nos, e ta biba asina cerca di nos curazon. Cu Dios duna luz eterno.